

СЛУЖБА

иже во святыхъ отцу нашему Іонѣ, епископу Ханькоускому, чудотворцу

На велицѣй вечерни, Блаженъ мужъ, 1-ый антифонъ.

На «Господи воззвах» стихиры на 6, глас 6 Подобень: «Все отложше»:

Похвало Козельска и Калуги славо, / казанскаго вертограда богословія
украшеніе / и Маньчжуріи пастырю предобрый, / вся концы отечествія и
разсѣянія русскаго / веселія божественнаго исполняеши, / житіемъ бо и писаніи
твоими утѣшаеши / и спасенія надежды подаеши, / изнемогшихъ отъ язвъ
грѣховныхъ благодати причащаеши // теплымъ предстательствомъ твоимъ,
богомудре Іоно, святителю Христовъ. *(дважды)*

Похвальную пѣснь вопіемъ ти, / иже о Душѣ Божественнѣмъ славный учителю¹ /
Писаній Божественныхъ сказателю предивный, / и суетумудренныхъ обличителю
доброумный, / аще и словесы твоими насладихомся, / обаче въ небреженіи
доселѣ пребываемъ, / но молися о насъ, богогласный Іоно, / да и житіемъ
послѣдуемъ благимъ ученіямъ, // имиже отъ тебе наставлени быхомъ.

Святое воспримъ постриженіе, / богоносе Іоно, / въ Оптину вселился еси, / и
тамо въ сердца своемъ слагая / премудрыхъ старцевъ глаголы, / Христовымъ
обогатился еси разумомъ. / Тѣмже вси пѣснями восхваляемъ свѣтлыя труды
твоя, / имиже паству твою наставилъ еси, // нравомъ отцемъ оптинскимъ
подобниче.

Веселися и радуйся Русь изгнанная, / въ тебѣ бо многосвѣтлую свѣщю возже
Христоръ, / богомудраго Іону святителя, / во странѣ маньчжурстѣй иновѣрныхъ
и отчужденныхъ отъ жизни Божія / добродѣтельнымъ житіемъ привлекшаго. /
Того молитвами, Христе, // ниспосли намъ велію милость.

¹ Заканчивая Казанскую духовную академію, будущій святитель написалъ блестящую
диссертацию о Святомъ Духѣ, въ результатѣ чего отецъ Іона былъ оставленъ профессорскимъ
стипендіатомъ.

Христова евангелія / исполнитель бывъ, / отче преподобне Іоно, / взалкавшимися
бо даль еси ясти, / возжадавшихся напоилъ еси, / больныхъ же и въ темницѣ
заточенныхъ посѣтилъ еси. / О, святе Іоно, / Владыку всѣхъ моли, // спасися
намъ въ день судный.

Слава гл. 3:

Отче Іоно, / іерарху Новаграда тезоимените, / въ житіи тому уподобивыйся, /
сырыхъ предстателю, / якоже бо той скорбь сиротства познавъ / врученное ти
стадо добре упаслъ еси, / отечески его снабдѣвая; / тѣмъ и по смерти сіяя
чудесы, / съ нимъ же молися Господеви, / спасти и просвѣтити // вѣрно
совершающихъ досточудную память твою.

И нынѣ, Богородиченъ, догматикъ, гласъ тойже:

Входъ. Прокименъ дне. Чтенія общесвятительскія три:

Притчей чтеніе.

Память праведнаго съ похвалами, и благословеніе Господне на главѣ его.
Блаженъ человекъ, иже обрѣте премудрость, и смертенъ, иже увѣдѣ разумъ.
Лучше бо сію куповати, нежели злата и сребра сокровища. Честнѣйшая же естъ
каменій многоцѣнныхъ, все же честное недостойно ея естъ. Долготѣ бо днѣй и
лѣта живота въ десницѣ ея, въ шуйцѣ же ея богатство и слава. Отъ устъ ея
исходитъ правда, законъ же и милость на языкѣхъ носитъ. Послушайте убо мене, о
чада, честная бо реку, и блаженъ человекъ, иже пути моя сохранитъ: исходи бо
мой — исходи живота, и уготовляется хотѣніе отъ Господа. Сего ради молю васъ
и предлагаю мой гласъ сыновомъ человеческимъ. Яко азъ, премудрость,
устроихъ совѣтъ, и разумъ и смыслъ азъ призвахъ. Мой совѣтъ и утверждѣніе,
мой разумъ, моя же крѣпость. Азъ мене любящія люблю, ищущіи же мене
обращутъ благодать. Разумѣйте убо, незлобиви, коварство, ненаказани же,
прилагайте сердца. Послушайте мене и паки, честная бо реку, и отверзу отъ
устенъ правая, яко истинѣ поучитъ гортань моя, мерзки же предо мною устны
лживыя. Съ правдою вси глаголы устъ моихъ, ничтоже въ нихъ стропотно, ниже
развращенно. Вся права суть разумѣвающимъ и проста обрѣтающимъ разумъ.
Научаю бо васъ истинѣ, да будетъ о Господѣ надежда ваша, и исполнитесь Духа.

Премудрости Соломоновы чтеніе.

Уста праведнаго каплють премудрость, устнѣ же мужей мудрыхъ вѣдять благодать. Уста мудрыхъ поучатся премудрости, правда же избавляетъ ихъ отъ смерти. Скончавшуся мужу праведну, не погібнетъ надежда. Сынъ бо праведень раждается въ животь и во благихъ своихъ плодъ правды объиметь. Свѣтъ праведнымъ всегда, и отъ Господа обрящутъ благодать и славу. Языкъ мудрыхъ добрая свѣсть, и въ сердцахъ ихъ почіетъ мудрость. Любитъ Господь преподобная сердца, пріятни же Ему вси непорочнии въ пути. Мудрость Господня просвѣщаетъ лице разумнаго: постигаетъ бо желающія ю, прежде даже разумѣти ю, и удобъ узрится отъ любящихъ ю. Утреневавый къ ней не утрудится, и бдѣя ея ради вскорѣ безъ печали будетъ. Яко достойныхъ ея сама обходитъ, ищущи, и во стезяхъ ея является имъ благопріемнѣ. Мудрости никогдаже одолѣетъ злоба. Сихъ ради и рачитель быхъ доброты ея, и возлюбихъ ю, и поискахъ отъ юности моея. И взыскахъ невѣсту привести себѣ, яко всѣхъ Владыка возлюбѣ ю. Тайбница бо естъ Божія хитрости и обрѣтательница дѣлъ Его. Труды ея суть добродѣтели: цѣломудрію же и разуму та учить, правдѣ и мужеству, ихже потребнѣе ничтоже естъ въ житіи человекѣмъ. Аще же и многаго искусства желаетъ кто, вѣсть дрѣвняя, и быти хотящая разсмѣтитъ. Свѣсть извѣтія словесъ и разрѣшенія гаданій, знаменія и чудеса проразумѣетъ, и сбытія временъ и лѣтъ, и всѣмъ совѣтникъ естъ благъ. Яко безсмертіе естъ въ ней и благославіе во общеніи словесъ ея. Сего ради бесѣдовахъ ко Господу, и помолихся Ему, и рѣхъ отъ всего сердца моего: Боже отцевъ и Господи милости, сотворивый вся словомъ Твоимъ и мудростію Твоею устроиый человекѣмъ, да владѣетъ бывшими отъ Тебѣ тварьми и да управляетъ міръ въ преподобіи и правдѣ. Дажь ми Твоихъ Престоловъ присѣдѣющую премудрость и не отлучи мене отъ отроковъ Твоихъ, яко азъ рабъ Твой и сынъ рабыни Твоея. Посли ю съ Небесъ отъ святаго жилища Твоего и отъ Престола славы Твоея, да, сущи со мною, научить мя, что благоугодно естъ предъ Тобою, и наставитъ мя въ разумъ, и сохранитъ мя въ славу своей. Помышленія бо смертныхъ вся боязлива и погрѣшительна умышленія ихъ.

Премудрости Соломоновы чтение.

Похваляему праведнику, возвеселятся людіе: безсмертіе бо есть пámять его, яко отъ Господа познавається и отъ чeловѣкъ, и угóдна Господеви душа́ его. Возлюбите́ убо, о мѹжіе, мѹдрость и поживетѣ: восхощитѣ ея́ и наказани́ бѹдете. Начáло бо ея́ любы́ и соблюденіе за́кона. Почтитѣ премѹдрость, да во вѣки цáрствуете. Возвѣщѹ вамъ и не скрѹю отъ васъ таинъ́ Божіихъ, яко Той мѹдрости наставникъ е́сть, и мѹдрыхъ исправитель, и всякому смѣслу и дѣлу хитре́ць. И всѣмъ смѣсломъ научитъ мѹдрость, е́сть бо въ ней́ Дѹхъ разу́менъ и свѣтъ, и сіяніе свѣта присносущнаго, и образъ блага́сти Божія. Тая дру́ги Божія и проро́ки устрояетъ, благолѣпнѣйши же е́сть со́лнца и пáче всякаго сотворенія звѣздъ, свѣту сосуждаема, обрѣтается пѣрвѣйши. Тая угождающихъ ей́ отъ болѣзни избáви и настави́ на стези́ правыя. Дадѣ́ имъ́ разу́мъ имѣти свѣтъ, и сохрани́ я́ отъ ловащихъ, и по́двигъ крѣпокъ подаде́ имъ. Да разумѣютъ всѣ́, яко си́льнѣйши всего́ е́сть благочестіе, и никогда́же преможетъ злóба мѹдрости, ниже́ пре́идетъ злы́я обличающы́ сѹдь. Реко́ша же въ себѣ́, помысливше неправедно: насильствуемъ праведному, и не пощади́мъ преподóбства его́, ни усра́мимся сѣдинъ́ старости́ многолѣтны. Бѹдетъ бо намъ́ крѣ́пость — за́конъ и улови́мъ праведнаго, яко неугóденъ намъ́ е́сть, и противится дѣ́ломъ нашимъ, и поно́ситъ намъ́ отпаденіе за́кона, и обличаетъ намъ́ согрѣшенія́ наказанія́ нашего. Возвѣщае́тъ намъ́ разу́мъ имѣти́ Божій, и отрока́ Господня́ себѣ́ именуе́тъ. Бы́сть намъ́ на обличеніе́ помышленій́ нашихъ и тяжекъ́ намъ́ е́сть и видимъ́, яко неподóбно инѣ́мъ житіе́ его́, и измѣнены́ стези́ его́. Въ поруганіе́ вмѣ́нихомся́ ему́, и удаляе́тся отъ путей́ нашихъ, яко отъ нечистотъ, и блажитъ́ послѣ́дняя праведныхъ. Увидимъ́ убо, а́ще словеса́ его́ и́стинна сѹть, и́скѹсимъ, я́же сбыва́ются ему́. Руганіемъ́ и мѹ́кою истя́жемъ его́, да разумѣ́емъ крóтость его́ и и́скѹсимъ беззлóбство́ его́, смѣ́ртію безобразною́ осѹдимъ́ его́, бѹдетъ́ бо посѣ́щеніе отъ словесъ́ его́. Сія́ помысли́ша и прельсти́шася, ослѣ́пи́ бо я́ злóба ихъ, и не разу́мѣша таинъ́́ Божіихъ и не разсѹди́ша, яко Ты́ еси́́ Богъ́ еди́нъ, живота́́ имѣ́й и смѣ́рти вла́сть, и спаса́й во вре́мя скорби́, и избавля́й отъ всякаго́ зла. Ще́дръ и Мило́стивъ, и да́й преподóбнымъ́ Свои́мъ́ благода́ть, и Свое́ю мѹ́щицею́ горды́мъ́ противля́йся.

На литіи стихи́ра хра́ма и стихи́ры святы́теля во глас 4:

Любовію къ Богу и людемъ подвижимый, / отче преподобне Іоно, / вмѣнился еси со
воины Христовы, духовно наставляя ихъ, / душею возставъ супротивъ врага
мысленнаго. / Наченшейся же брани братоубійственнѣй, / ты, яко іерей Божій, /
защититель вѣры и ближняго благодержзновенно явился еси, / душу свою за други
полагая, / словесы и ученьми утѣшая, // и образомъ житія твоего согрѣвая.

Проповѣдуетъ тя Церковь Божія / стража вѣрна овецъ словесныхъ, / ихже ты въ
безгодіе и дни треволненій мудре упаслъ еси, / въ вѣрѣ до конца соблюлъ еси / и
молитвою за вся жертвеннику Господню предстоялъ еси. / Святителю отче, /
такое просвѣтися свѣтъ твой предъ челоуѣки, / иже видѣвше добрая дѣла твоя, //
прославиша Отца нашего небеснаго.

Слава, гласъ тойже:

Вѣренъ Богу и Церкви былъ еси даже до смерти, / святче Іоно, / нынѣ же со
святыми, въ земли Русской просіявшими, / моли Господа о спасеніи всѣхъ, //
благочестно чтущихъ память твою.

И нынѣ, Богородичень, гласъ тойже:

Бысть чрево Твое святая трапеза, / имущая небеснаго Хлѣба, Христа Бога
нашего, / отъ Негоже всякъ ядѣй не умираетъ, // якоже рече всѣхъ,
Богородительнице, Питатель.

На стиховнѣ стихи́ры, гл. 5. Подобень: «Радуйся»:

Радуйся отче Іоно, / благочестія крѣпкое утверждение, / отеческихъ преданій
неусыпный хранителю, / падшихъ кроткій и милостивый обличителю, / о чадѣхъ
же своихъ молитвенниче / и предстателю предъ Господемъ неусыпный, / Емуже
нынѣ во славу предстоиши, // поминай насъ любовію чтущихъ память твою.

Стихъ: Честна предъ Господемъ / смерть преподобныхъ Его.

Радуйся отче Іоно, / ієрарше Божій изрядный, / правило вѣры и добродѣланія, / таковъ подобаше архіерей намъ: / преподобенъ, честенъ, незлобивъ, / человекомъ удобоприступный и присный Христовъ, / Емуже нынѣ во славѣ предстоиши // поминай насъ любовію чтущихъ память твою.

Стихъ: Что воздамъ Господеви о всѣхъ / яже воздаде ми.

Радуйся отче Іоно, / благосердый плачь о паствѣ изгнанной воспріавый, / скорбь о ней въ сердца своемъ носивый, / подъ крестомъ служенія ближнимъ не изнемогшій, / но за чадъ Руси Святыхъ со умиленіемъ Христу моливыйся, / многими слезами Господа на милость приклонивый, / Емуже нынѣ во славѣ предстоиши // поминай насъ любовію чтущихъ память твою.

Слава, гл. 6:

Днесъ беззаконующіи умолчаша / и ненавистницы Церкви Христовы посрамишася, / малое же стадо дерзаетъ / и паства во отечествіи и въ разсѣяніи сущая свѣтло красуется / въ совершеніи памяти святителя Іоны, / тѣмже и мы вопіемъ ему: / даруй и намъ благословеніе твое, отче, / крестъ свой носити достойно / и стезею твоею шествующе неуклонно, // славы небесныя съ тобою улучити.

И нынѣ, Богородиченъ гл. тойже: «Творецъ и Избавитель мой».

На благословеніи хлѣбовъ: Тропарь гл. 4 (дважды):

Пастырь добрый былъ еси русскимъ людемъ, / пристанище обрѣтшимъ во чуждѣй странѣ, / всяко наставляя ихъ, / наипаче же любви Христовой, / образъ любви нелицемѣрныя во всѣмъ показуя, / тѣмже, святителю отче Іоно, // моли Христа Бога спастися душамъ нашимъ.

«Богородице Дѣво» единожды.

НА УТРЕНИ

На «Богъ Господь» тропарь дважды.

Слава, и нынѣ, Богородиченъ: «Еже от вѣка утаенное».

По 1-мъ стихословіи сѣдаленъ, гл. 1: Подобенъ «Камени запечатану»:

Тайну любви Божія познавъ, глагола еси: подвигъ есть жизнь за инья, юже всю Христу Богу предавъ, молися о спасеніи душъ нашихъ.

Слава: Яко многоцѣнный даръ пріять дальній градъ маньчжурскій святыхъ мощи твоя, ханькоускій свѣтильниче, міръ же весь благодатию отъ тебе исходящею напояется, воспѣвая: Радуйся, отче Іоно, молитвенниче о душахъ нашихъ.

И нынѣ, Богородиченъ: Упованіе христіанъ, Пресвятая Дѣво, Егоже родила еси Бога, паче ума же и слова, непрестанно моли съ вышними силами, подати оставленіе грѣховъ нашихъ, и исправленіе житія, присно Тя славящимъ.

По 2-м стихословіи сѣдаленъ, гл. 6: «Ангельскія силы»:

Пастырь добрый и наставникъ предивный паствѣ былъ еси, святителю Іоно, и мы хвалу ти воспѣваемъ яко великому свѣтильнику церкви нашея. Сего ради взываемъ: моли Христа Бога грѣховъ оставленіе даровати празднующимъ любовію святую память твою.

Слава: Со тщаніемъ въ виноградникъ Христовомъ потрудился еси, воистину добрую жатву добродѣтелями возрастилъ еси, души паствы твоея, въ точилѣ гоненій и изгнанія сокрушенныя, доброе дали суть вино, тѣмже Господь твой возрадовася.

И нынѣ, Богородиченъ: Недвижимое утвержденіе вѣры и честный даръ душъ нашихъ, Богородицу пѣсньми величаемъ, вѣрніи: радуйся, Камень жизни во чревѣ Твоемъ вмѣстившая; радуйся, скорбящихъ заступленіе; радуйся, Богомати Пречистая.

По поліелеи сѣдалень, гл. 2:

Святителю Христовъ и угодниче Іоно, тѣплымъ твоимъ предстательствомъ отроковъ и юныхъ во оградѣ церковнѣй соблюди, да не омрачатся развращеніемъ міра сего, и всякимъ лжеученіемъ волковъ лютыхъ да не уловлены будутъ.

Слава и нынѣ, Богородичень:

Радуется нынѣ Іоаннъ, святитель Тобольскій, въ землю китайскую первыхъ проповѣдниковъ православія пославый, идѣже и славный сродникъ его прославился; радуется и Иннокентій, свѣтильникъ Иркутскій, благовѣстникомъ Христовой вѣры въ странѣ дальнѣй споспѣшникъ; радуются первомученицы китайстіи, за Христа даже до крове пострадавшии, Егоже молятъ съ Препоблагословенною Богородицею присно согрѣшеній оставленіе даровати воспѣвающимъ достойно новаго угодника Его.

Степенна 1-ый антифонъ 4-го гласа. Прокимень гл. 4:

Честна предѣ Господемъ смерть преподобныхъ Его. Стихъ: Что воздамъ Господеву о всѣхъ, яже воздаде ми? Всякое дыханіе. Евангеліе отъ Матфея, зачало 11.

По 50-мъ псалмѣ стихира, гл. 6:

Пѣсньми воспоимъ хвалу святителю Божию Іонѣ, / единому отъ тѣхъ, ихже міръ недостойнъ бѣ, / иже воистину христіанскимъ житіемъ вѣрность Христу показаша / и съ терпѣніемъ велимъ злаго врага посрамиша, // смиреніемъ своимъ гордость его низпровергнувшии.

КАНОНЪ

молебный ко Пресвятѣй Богородицѣ со ірмосомъ на 6, и святаго на 8, глас 6.

Пѣснь 1. *Яко по суху:*

Твоему, Христе, угоднику хвалу достойну воспѣти даруй ми, Владыко, отъ устенъ нечистыхъ и разума помраченна, и молитвами его воздвигни отъ расслабленія грѣховнаго душу мою.

Казанскія земли украшеніе преславное явился еси, отче Іоно, служеніемъ пастырства и учительства подвигся, свѣтомъ евангельскимъ юныя просвѣщающе и мракъ невѣденія далече отъ нихъ отгоняюще.

О, гласа плача твоего, блаженне Іоно, о людѣхъ Руси, во отечествіи и въ разсѣяніи сущихъ! Имже и насъ покаянію и исправленію научаеши, и изъ сердца окаменевшаго слезы изводиши, якоже древле Моисей изъ камене воду, да вси съ нимъ зовемъ Богу, спасающему насъ: славно бо прославися.

Богородичень: Всѣму отечеству нашему вмѣнися честная икона Твоя Казанская, Владычице Богородице, всю землю Россійскую любовію Твоею озаряеши, Заступнице Усердная, тѣмже и къ жизни духовнѣй, въ Бозѣ сокровеннѣй, люди Твоя недостойныя устрояеши.

Пѣснь 3. *Нѣсть святъ:*

Языкъ твой воистину книжника трость, Духомъ Божественнымъ движимъ, сказуетъ преславно Писаній сокровенная и отеческихъ словесъ потаенная, еретичествующихъ и безбожныхъ писанія пречертаетъ, веселитъ же духовно поющія всечестную память твою, Іоно.

Исповѣданіе вѣры правое, яко апостоломъ и отцемъ древнимъ наслѣдникъ истинный добре засвидѣтельствовалъ еси, во учительствѣ подвижаяся, и юныя ученики твоя укрѣпляя, въ ветрахъ суетудрій не влаетися отнюдъ, но къ свѣту Божественныхъ догматовъ взирати.

Явился еси древнихъ отцевъ житія подражатель истиненъ, служеніемъ ближнимъ дѣланіе молитвенное растворивъ, во обою же страхомъ сыновнимъ Господеви предстоя, усыновленіе же и обоженіе во Христѣ улучилъ еси.

Богородичень: Аще и оскудѣша во дни послѣднїя наставницы духоноснїи, но Ты, Пречистая Владычице, Сама наставница ко спасенїю рабомъ Твоимъ буди, смолебники прїимши отцы богомудрыя, ихже писаньми назидаемся.

Сѣдалень, гл. 5. Подобень: «Собезначальное Слово»:

Вѣры ради ятъ бывъ, / въ темницу всажденъ былъ еси, / но Богъ инъ путь тебѣ предначерта, / русскимъ людемъ во благое. / Тѣмже молимъ тя, / моли Христа Бога намъ въ вѣрѣ утвердиться // во спасенїе душъ нашихъ.

Слава и нынѣ, Богородичень:

Сладосте ангеловъ, скорбящихъ радосте, христїанъ предстательнице, Дѣво, Мати Господня, заступивши ны, отъ грѣха и вѣчнаго мученїя спаси души наша.

Пѣснь 4. Христось моя сила:

Отеческихъ писанїй хранитель и продолжатель тѣхъ, святителю Іоно, явился еси, творенїя ихъ юношамъ преподавъ еси, богоугоднымъ же житїемъ силу словесъ ихъ явилъ еси.

Христово смиренїе стяжавъ, и мужествомъ препоясанъ, исходиши на служенїе ново и яко левъ, уповая на Господа, предъ скимны рыкающими право ходилъ еси.

Единаго Сущаго на небесѣхъ паче всякаго страха убоявся, Тому Единому всякимъ усердїемъ поработалъ еси, и коварствїя богоборцевъ оплевавъ, съ Нимъ навѣки воцарился еси.

Богородичень: На Тя всю надежду спасенїя нашего возложимъ, Богомати Неискусобрачная, и Тя призываемъ присно на помощь: спаси ны отъ напастей и печали, разрѣши пленицу золь моихъ и Суда мя исхити.

Пѣснь 5. Божїимъ свѣтомъ:

Милостію къ скорбящимъ украсился еси, раздающе алчущимъ хлѣбъ твой, болящимъ же всеусердно послужилъ еси, словомъ пастырскимъ, молитвою и увѣщаніемъ.

Москва хвалится юностію твоею, Калуга же и Казань ученіемъ твоимъ², Оптина монашествомъ, но паче всѣхъ Маньчжурія тобою славится, яко пастыремъ рѣвностнымъ и предсѣдателемъ любвеобильнымъ.

Возлюбилъ еси Господа и всю жизнь Тому поработалъ еси, многи скорби претерпѣвый и души многихъ, святителю, ко Христу наставивый, Емуже молися спастися намъ.

Богородичень: Просвѣти, Чистая, любовію чтущихъ Тя и величающихъ, разрѣши страсти наша. Тѣмъ, Дѣво, устави ихъ бурю и лукаваго соблазны отъ среды нашея отжени молитвами Твоими.

Пѣснь 6. *Житейское море:*

Богоборцемъ и иновѣрнымъ вѣрою крѣпкою, святителю, противусталъ еси, паству твою отъ волковъ губительныхъ оградити тщася, гнѣва злоствующихъ никакоже убоялся еси, ниже осужденія человѣческа.

Долготерпѣнію твоему небеса и земля подившася, яко въ самыхъ когтѣхъ звериныхъ плотію держимъ, не престалъ еси уповати на Господа и возвѣщати истину Его, преславно тя, якоже пророка отъ чрева китова, свободившаго.³

Святительства истиннаго образъ былъ еси, страстей взыгранія первѣе обуздавъ на стражѣ сердца твоего, умъ епископомъ поставилъ еси, тѣмже и овцы Христовы ко пристанищу небурному мудре управилъ еси.

² Будущій святитель закончилъ Московское Заиконоспасское духовное училище и Калужскую духовную семинарію, по успѣшномъ окончаніи которой въ 1910 году былъ отправленъ на казенный счетъ въ Казанскую духовную академію.

³ Иеромонахъ Іона былъ арестованъ въ маѣ 1918 г. Черезъ 10 дней его спасли войска Сибирскаго правительства, освободившія Тобольскъ.

Богородичень: Истины свидѣтели, Сына Твоего служители вѣрніи на Тя, Богомати, упованіе свое возложиша и подѣ кровомъ Твоимъ сохраняеми на огонь и смерть дерзаху, ихже молитвами и нас укрѣпи, Владычице наша Всепѣтая.

Кондакъ гл. 3.:

Дѣтемъ не возбранилъ еси приходи кѣ тебѣ, богоблаженне, / пекийся о насущныхъ ихъ, / и храмину имъ создалъ еси, / по кончинѣ же твоей ихъ не оставилъ еси, / отрока бо разслабленна въ сонномъ видѣніи исцѣливъ. / сего ради вопіемъ ти: // Радуйся, чудодѣйственниче, Іоно преславный.

Икосъ: Кѣ Богу и людѣмъ стяжавъ любовь истинную и нелицемѣрную, святителю, любите другъ друга дѣтемъ взывалъ еси, имже образъ былъ еси словомъ и житіемъ, любовію, духомъ, вѣрою и чистотою; сего ради чудотворенія многа и знаменія Божія силы вѣрнымъ о тебѣ явишася, тѣмъ же и со безплотными нынѣ ликовствуя, неотлученъ отъ чадъ своихъ пребываеши: о сопричастниче святымъ, отъ бѣсовскихъ насилій своимъ предстательствомъ насъ огради, и кѣ горнѣй любви сердца уязви благодарственно тя воспѣвающихъ: радуйся, чудодѣйственниче, Іоно преславный.

Пѣснь 7. Росодательну убо пещь:

Воинъ Христовъ непобѣдимъ показался еси, противу безбожныхъ твердымъ исповѣданіемъ вооружився и отступльшимъ палицею словесъ твоихъ противуставъ, вѣнцемъ исповѣдника отъ Господа увязался еси.

Единаго на потребу усердно взыскавъ, житія сего сластями не прельстился еси, тѣмже и поставляетъ тя на свѣщницѣ архіерейства Господь, да свѣтиши разумѣнія свѣтъ людѣмъ Его.

Днесъ вѣрніи овчата Христовы пастыря добраго прославляемъ, предъ овцами своими дерзновенно ходившаго и тѣхъ по имени глашавшаго и ко обителемъ небеснымъ дивно наставльшаго.

Богородичень: Поємъ Тя, Богоневѣсто, Мати Христа Бога, славяще Рождество Твое непостижимое, имже избавихомся отъ всякія бѣды, Владычице, и вѣрно вопіемъ: помилуй стадо Твое, едина Всепѣтая.

Пѣснь 8. *Изъ пламене преподобнымъ росу:*

Радости присносущныя надѣждею препоясався, терпѣніемъ въ подвигъ страдальческій вшелъ еси, тѣмже не посрами Господь упованія твоего съ лики святыхъ сочета тя, поющаго: вся дѣла благословите, Господа пойте и превозносите Его во вѣки.

Елицы Писаній Божественныхъ разумѣніе пріясте, пріидите купно восхвалите тѣхъ сказателя богомудраго Іону, вопіюще устомъ его слово Подавшему: вся дѣла благословите, Господа пойте и превозносите Его во вѣки.

Воистину ни единъ же отъ малыхъ сихъ забвенъ бысть у тебе, блаженне Іоно, ко всѣмъ бо любви твоя распростресея, нищимъ и простецемъ, наипаче же сирымъ, источникъ неоскудѣвающій слова Божія отверзаеши взывающимъ: вся дѣла благословите, Господа пойте и превозносите Его во вѣки.

Богородичень: Аще и отечества земнаго лишеніе попущеніемъ Божіимъ пріиде вѣрнымъ Твоимъ, но явилася еси милостивая Утѣшительница имъ въ знаменіи обновленія иконъ Твоихъ, отъ нихже чудеса источила еси, тѣмже и мы вопіемъ Ти: небеснаго отечества врата отверзи намъ толкущимъ, яко Благая Вратарница еси, двери райскія вѣрнымъ отверзающая.⁴

Пѣснь 9. *Бога человѣкомъ:*

⁴ Въ 20-ые и 30-ые годы XX вѣка на Дальнемъ Востокѣ часто совершались знаменія обновленія старинныхъ иконъ, укрѣпившія русскихъ православныхъ изгнанниковъ въ постигшихъ ихъ испытаніяхъ, о чемъ писалъ въ своей извѣстной статьѣ на эту тѣму митрополитъ Харбинскій и Маньчжурскій Меєодій.

Отче святителю Іоно, кончину свою предзря, со умиленіемъ исходное пѣніе приносилъ еси Владычицѣ, во успеніи Своемъ міра не оставльшей, тѣмже и насъ бѣдствующихъ скорбми не остави, вѣнцемъ увязся отъ Господа нетлѣннымъ во вѣки.

Смерти предстоя, кротостію и незлобіемъ всѣхъ простилъ еси, чадѣмъ же твоимъ любовь Христову простирая, дѣти, любите другъ друга наставляя еси, тѣмже и насъ съ высоты славы Божія благослови, да въ единеніи и любви спасемся.

Истинныя славы взыскую, отче Іоно, тлѣнную и земную ни во что вмѣнилъ еси, тѣмже и намъ помози руцѣ ослабленніи на молитву въздѣти и очи горѣ возвести, да грядущаго во славу Господа бодреннымъ сердцемъ усрящемъ и славы Его причастницы будемъ.

Богородичень: Милостива намъ Сына Твоего покажи, Препоблагословенная Мати, въ часъ судный, вѣрнаго угодника Твоего Іону смолебника пріимши и заступника тѣпла, да грядущаго во славу Господа бодреннымъ сердцемъ усрящемъ и славы Его причастницы будемъ.

Свѣтилень: Подобень: «Апостоли отъ конецъ»:

Въ пѣснѣхъ достойныхъ почтимъ славнаго іерарха Ханькоускаго Іону, добродѣтелями украсившагося, отъ востока дальняго днесъ возсіявшаго, и въ разсѣянніи сущихъ свѣтомъ Христовымъ просвѣтившаго.

Слава и нынѣ: Богородичень:

Щедроты Твоя, Боже, на люди и стадо Твое низпосли, молитвами Пречистыя Твоя Матере, и всѣхъ святыхъ Твоихъ, и намъ даруй велию Твою милость.

На хвалитехъ стихиры, на 4, гласъ 1.

Въ годину гоненія люта истинный Христовъ служитель показался еси, / евангельское слово утверждая, / воиновъ назидая и утѣшая, / и благоговѣйно

Господеви принося жертву безкровную, / тѣмже вопіемъ ти: / о святе Іоно, / моли Его отъ врагъ видимыхъ и невидимыхъ насъ избавити // и душамъ нашимъ спасеніе улучшить.

Аще и безмолвствуютъ горы и пустыни, / яже многими скорбьми прошелъ еси въ землю Китайскую иногда / съ чудотворною иконою Богоматери Табынскою, / но мы тя прославляемъ яко вѣры наша утврєденіе / и писаній изъяснителя, / іерарховъ похвалу и преподобныхъ украшеніе, / сирыхъ любителя и нищелюбія ревнителя, / исповѣдника крѣпкаго // и молитвенника тѣплаго о душахъ нашихъ.

Исходы твои, отче Іоно, / исходы живота показашася, / се бо въ соніи легкою явившеся отроку болящу, / о пребывающемъ животѣ свидѣтельствовавъ еси, / возьми мои нозѣ, свои же подаждь ми, рекъ ему, / и удиви вся исцѣленіемъ его, / тѣмже вопіемъ ти: // молися о исцѣленіи душъ нашихъ.

Рыданіемъ неутѣшнымъ воздухъ огласися, / егда тысящи христіанцевъ гробу твоему предсташа, / провождающа небоходное шествіе твое, / но не оставилъ еси сирыхъ чадъ твоихъ, / молитвою твоею, чудесы и наставленьми // утѣшая и укрѣпляя души ихъ во вѣки.

Слава, гл. 6:

Благій и вѣрный рабе, / добрый дѣлателью винограда Христова, / святительство твое во странѣ китайстѣй дивно бысть: / данный бо ти талантъ преумножилъ еси, / и воистинну христіанскія кончины сподобился еси, / тѣмже и во обители райскія ангели тя вознесоша; / и нынѣ яко вшедый въ радость Господа своего, / умоли Его, славне Іоно, // о спасеніи душъ нашихъ.

И нынѣ, Богородичень, гласъ тойже: «Богородице, Ты еси лоза истинная».

Славословіе великое. Ектеніи и отпустъ. На Литургіи: блаженна отъ канона пѣсни 3-я и 6-я. Прокименъ, гл. 7-ый: Возвеселится праведникъ о Господѣ и уповаеть на Него. Стихъ: Услыши, Боже, гласъ мой: Апостолъ къ евреемъ,

зачало 335. Аллилуіа, гл. 4-ый: Священницы Твои облечутся въ правду: Евангеліе отъ Луки, зачало 24-ое. Причастенъ: Въ память вѣчную.

**Молитва иже во святыхъ отцу нашему ІОНЪ,
епископу Ханькоускому, чудотворцу.**

О, преблаженне Іоно, подвижниче предивный и о насъ къ Богу молитвенниче непрестанный! Саномъ архіерейства почтенъ бывъ, ко Христу дивную любовь показаль еси и благодатію Его на труды и подвиги укрѣпился еси, паствѣ же твоей и отрокомъ послужилъ еси, сего ради, еще сый на земли, веліе къ Троицѣ дерзновеніе имѣль еси; егда же о предстоящей нечаянной кончинѣ вѣсть отъ врача пріяль еси, ко Господу съ вѣрою и смиренною молитвою притеклъ еси, волю Божию приѣмля, таже скорбя о паствѣ, паче же о дѣтѣхъ, Господа просилъ еси не оставити ихъ сирыхъ; нынѣ же прибѣгающе къ тѣплому предстательству твоему, прилежно молимъ тя: окомъ благосердымъ любве твоея возри на насъ грѣшныхъ, помощи твоея требующихъ: вѣрныя въ ревности поддержи, борющіяся со страстьми въ подвизѣхъ укрѣпи, лѣнныя ко исправленію скоро подвижни: всѣмъ же намъ вкупѣ, якоже заповѣдалъ еси наипаче блюсти заповѣдь Христову, еже любити другъ друга, помози и посѣщенія благодати Святаго Духа испроси. Да вся наставленія твоя храняще, сподобимся и мы Царствіе Христово наслѣдити и купно съ тобою славити Отца и Сына и Святаго Духа во вѣки вѣковъ. Аминь.